



09078

兩山墨談卷之十五

子房進履於圯邊韓信受辱於跨下後一爲帝者師一南面而王蓋惟能下人故能上人也然子房猶號知道揚誠齋詩云少年跨下安無忤老父圯邊慢不平人物若非觀歲暮淮陰何必減文成信乎先民有言保初節易保晚節難觀之淮陰可見矣

史記秦楚月表叙曰昔虞夏之興積善累功數

墨談

卷十五

十年德洽百姓攝行政事考之于天然後在位湯武之王乃由契稷修行仁義十餘世不期而會孟津八百諸侯猶以爲未可其後乃放伐秦翹襄公彰於文穆獻孝之後稍以蠶食六國百有餘載至始皇乃能并冠帶之倫以德若彼用力如此蓋一統若斯之難也詳其文意以德者是指虞夏商周而言用力者殆指秦也蓋謂昔之欲一天下者用德如虞夏商周必積累數十世而後成用力如秦亦須更涉數世而後克所

吳興陳霆

書齋

兩山墨談

書齋

謂一統之難如此索隱不察其意乃於以德若
彼下註曰即契與后稷及秦襄文穆也用力如
此下註曰謂湯武及始皇也夫以秦世數公之
蠶食爲用德而以湯武之伐暴爲用力此殆後
世非聖叛道之言豈儒者之論哉

叔孫通希世苟合之士其爲秦博士二世怒諸
生之言反者通即詭曰諸生言皆非也夫天下
合爲一家毀城鑠兵示天下不復用且明主在
上法令兵於下使人人奉職四方輻輳安敢有

墨談

卷十五

反者此特群盜鼠竊狗偷何足置之齒牙間二
世乃喜迨秦亡則事楚楚蹶則降漢短衣楚製
取悅高祖兩生有言通所事者且十主皆面諛
以取親貴是其志行不信於人久矣然則豈以
身殉國者哉其諫易太子持一時小忠而楚漢
春秋乃云臣三諫不從請以身當之撫劍將自
殺太史公亦載其言曰陛下必欲廢適而立少
臣願先伏誅以頸血汚地此不過勉爲危言以
聳動高祖倘信其守死不貳則誤矣

古者以車戰三代以前未用步也晉伐無終及
群狄于太原將戰魏舒曰彼徒我車所遇又阨
以什攻車必克困諸阨又克請皆卒自我始乃
毀車爲行設五陣以相離誘之群狄大敗是後
世之步戰始此

公羊傳威十六年屬負茲云云注云屬托也諸
侯疾稱負茲言托疾也然茲義未詳或謂茲草
也負茲猶言負薪蓋謙言有疾不能負草也予
謂不然史記叙武王入商事康叔封布茲注云
茲蓐席也然則負茲者蓋言有疾而負蓐如所
謂坐蓐伏簣也

范元卿上太守月詞中有云有人吟諷紫荷香
滿晴陌韻語陽秋云按晉輿服志八座尚書則
荷紫以生紫爲袷囊服之在左肩所謂荷紫者
非荷芰之荷乃負荷之荷也人徒見南史着紫
荷囊四字遂作一句言之蓋不知晉書荷紫之
義予讀宋史宣和間任子太濫有年始十餘歲
而蔭補通顯者諫官李會疏論以謂尚嬉竹馬

已獲荷囊以荷囊對竹馬則紫荷相承之說久矣

衛懿公好鶴鶴有乘軒者乘軒蓋恩禮視大夫也而北齊後主臨御爵祿輕濫御馬及犬乃有儀同郡公之號籍以海鱗食物十餘種蓋前乎此而秦松封五大夫後乎此而宋石爵磐固侯卒之召亂致禍如出一轍然後知先王之重名器而卻玩好非志慮之明遠不能也

左傳成十六年晉伐鄭楚子救鄭遇於鄢陵楚

墨談

卷十五

四

子登巢車以望晉軍子重使太宰伯州犂侍于王後王曰騁而左右何也曰召軍吏也皆聚於中軍矣曰合謀也張幕矣曰虔十於先君也徹幕矣曰將發命也甚囂且塵上矣曰將塞井夷竈而爲行也皆乘矣左右執兵而下矣曰聽誓戰乎曰未可知也乘而左右皆下矣曰戰禱也此節皆聚於中軍矣張幕矣徹幕矣甚囂而塵上矣皆乘而執兵下矣戰乎乘而左右皆下矣皆楚子望見而疑問之詞曰以下則州犂答詞

也楚子之語總之以王曰一言而下節則不復有所系然其語句簡便意脉通貫此正左氏善叙事處使他人叙此不知當費幾何語矣此作文之法學者不可不知也

南宋諸陵在會稽縣之上皇村至元二十二年八月內爲西僧楊璉等所發周草窻雜識畧云初徽欽葬五國城數遣使祈歸梓宮凡六七年而後許旣還行在一時朝野以爲大事諸公論功受賞所費不貲先是選人楊煒貽書廟堂乞

墨談

卷十五

五

奏請大臣取神視之最下者斲而視之朝議以不欲逆詐請用安陵故事梓宮入境即承之以擲納衮冕翬衣其中遂不復改欽至此被發徽欽二陵皆空無一物徽陵有朽木一段欽陵有木燈檠一枚而已蓋當時已料其真僞不可知徒慰一時之人心耳而二帝遺骸浮沉沙漠初未嘗還也每閱至此私恨虜讐之深宋茹寃之極然考之史傳蓋有未足信者紹興十二年和議成金人以徽宗鄭后梓宮來歸于時欽宗尚

在也至三十年逆亮謀南侵於是遇害于燕然則塋五國城之說妄矣未幾孝宗登極遣使求河南陵寢地金主曰汝國何舍欽宗靈柩而請鞏洛山陵如不欲欽宗之柩我當爲爾國葬之明年三月竟以一品禮葬于鞏洛之原是欽宗之柩終南宋之世未嘗返行在也然則又安有攢宮於六陵之間耶夫攢宮且未嘗有而水燈檠又安所寄耶即是而推則朽木之說疑元人習聞當時有逆詐之言故附會妄傳而致記者之誤信耳

程學士嘗預修宋綱目謂得於黃文獻公之言乃信陞秀夫官止簽書樞密院事文山官止樞密使同都督諸路軍馬因遂奏御悉改舊史所稱於文死節日書殺宋少保樞密使信國公文某陸抱帝赴海日則止書其氏名且謂當時同事者見世習稱二公爲相憚於驟更惟彭文憲與予意合予竊疑之考之宋史與陳氏續編俱載德佑二年正月拜文公右相兼樞密使往

使伯顏軍前公辭相以行被執而逃五月益王即位公自溫州入朝申右相兼樞密使之命至六月復詔公同都督諸路軍馬乃出開府日月次第可考不誣而程主於前言乃於入朝命相之條止書以爲樞密使同都督諸軍於其目中添著命相固辭之語且合六月所詔同都督之命於命樞之曰此其自信而好異之過也考文公在當時其自鎮江得逃楊有脫歸兵言元密遣一丞相入真州說降丞相謂公也公以夜抵

大星談

卷十五

七

楊城下聞候者談制司下令備文丞相甚急張弘範語厓山士民曰汝文丞相已執復欲何爲厓山亾日置酒大會張謂公曰國亾丞相忠孝盡矣能改心以事今將不失爲宰相也是丞相之稱在當時已習雖然此未足據也指南錄公所著也而有句云爭元作相總成塵先太師祭文公所誤也而有句云再相出督身荷憂責臨刑之日元主問其何願對曰天祥爲宋宰相安事二姓然則其自言亦固謂爲相矣若其年譜

本傳則皆書云辭者此實有故蓋古者國亾則責備於君相當時宜中世傑實用事公雖任相而出督于外朝事不預知意以他人壞之而已當其得天下後世當必有責備之者雖公以身殉國而亦不免介介於後世名此所以有命必辭而不得已則出而任事年譜本傳亦因公之心迹而書之然告詞錄黃不聞繳納則固已爲相矣若陸之除拜則又有可言者陸初與陳宜中不協謫居潮州後張世傑言諸行朝召爲簽

墨談

卷十五

八

書樞密院事時景炎二年之十月也續編載祥興即位以陸爲左丞相兼樞密使與張世傑同秉政程乃削而不錄謂其死日官止簽樞夫自景炎召還至祥興二年死國踰越三載安得猶守初職也且承平之時兩府轉遷尚不踰歲此爲何時而用人乃爾艱難之際命相爲急于時宜中既逃文公出督張世傑雖稱秉政而以武臣不拜然則首尾三年之間其任相者誰歟陳仲微從二王入廣目擊時事其所著衛王本末

云祥興即位以陸秀夫爲丞相張世傑太傅
南錄亦云陸君實永嘉推戴有力及駐厓山兼
宰相凡朝廷事皆其潤色紀綱之據此則陸固
厓山之相也吾意當時播越海濱封拜草草雖
以陸之入相而遠近或未悉知迨其滅亾而紀
事如填海等錄追書舊事習其初稱故但云已
耳而程乃盡廢舊史獨據以爲筆削之案此又
其自信而好異之過也二公之取重於天下後
世初不係於官爵獨謂續綱目既詔行誠慮夫
學者不考而宗信之也故著其說於此

嚴光之不屈世皆謂其立志高潔此知光之外
者也新安程克勤曰先生當西漢末避莽亂棲
迹草澤以待天下之一遇光武之主猶以爲未
慊而去之非其君不事也侯霸亦先生故人位
三公矣仁義阿順之語凜然下飭若免焉非其
友不友也先生之學雖莫知所從來殆必有揆
之中而安放之遠而準將與伯夷相望而興者
所謂非常人也其立論頗異流輩然獎與疑太

過矣原光與帝舊同硯席其相處非一朝一夕而已燕昵之私徵逐之狎在人情所不能免而况其時光已年長視帝則子弟行也則夫語言容色之間寧免於倨肆而周旋禮度之際安保其無欽耶及帝登極光疑其或未能忘已而容物於是變姓名隱之澤中而帝追念故人意不能忘也乃遣使物色之迨其詣闕而後偃卧於實館加足於帝腹凡此皆光欲以嘗帝而俟霸雖舊人然不能知也故雖位居鼎足而輒有癡

兒之譏要領折之警觀此則光之素挾長凌物微可見矣諫議之除帝將資其鯁諤之益而光以受命于朝當必改趨易步強已所不能而隨時俯仰則夫君臣之形迹上下之名分恭遜之容祗承之態度不能一旦弔勉而曲盡其禮於是終於辭避至以堯舜巢由之言婉卻之而帝亦度光不可留強之或累異日之保全也乃聽其去然前此有狂奴故態之言則帝之微意可見矣此則光之始終表裏春秋所謂推見至隱

者也尹遂昌謂光與帝同學之時固已年尊於帝至帝君臨大寶召至闕下光是時蓋已年踰耳順矣以年尊德邵之人帝不能待以賓師之禮乃欲臣而用之宜乎光之不應也此得其形似而未悉其心予故備論之

宋有陳仲微者咸淳中以言事切直罷官後起爲兵部侍郎脩國史丙子從二王入廣暨崖山敗流落安南臨歿有詩曰死爲異國他鄉鬼生是江南直諫臣安南國王挽之以詩曰痛哭江

南老鉅卿春風搵淚爲傷情無端天上編年月不啻人間有死生萬疊白雲遮故國一堆黃土覆香名回天力量隨流水流水灘頭共不平仲微之詳見本傳其偷生外國雖與陳宜中同科然宜中身爲大臣且當國用事國亡與其君同死社稷固其職也願遺君棄親逃避他國於國則不忠於家則不孝一死有餘責矣若仲微視陸秀夫輩雖有愧要之猶愈於投降賣國者其踪跡亦可憐也

世傳宋梁顥以八十二歲登狀元故其謝表有云白首窮經少伏生之八歲青雲得路多太公之二年又其詩云天福三年來應舉雍熙二載始成名今考顥傳顥以雍熙二年及第歷官二十載至眞宗景德元年六月病卒年九十二逆而數之至登第之歲除去歷官二十年止應年七十二是知世俗所傳者妄也又按八十二歲之說具遜齋閒覽容齋四筆辯其謬誤然又謂年止四十二殊不可曉又謂史稱梁方當委遇

吳墨談

卷十五

十一

中途天謝今考本傳無之豈元人刪之耶

史記漢文帝二年十一月晦日有食之十二月望日又食徐廣以爲望日又食按漢書及五行傳皆無此文一本作月食然月食史書所不紀予謂此月食無疑也刊本字誤耳蓋日食必於朔月食必於望此日月相會與對望所致時以晦既日食望又月食不半月間而兩經災變故於望日下詔書脩省而懼災之意則因感月食之變而益謹日食之戒也故詔止云乃十一月

晦日有食之景帝後三年十月日月皆食云十月而不繫以日必是月朔望日月分食非一日事也是後十二月晦雷徐廣云雷一作晝字又作圖字實所未詳予疑雷雷字誤也十二月晦日而雷有聲則所發非時故特紀異耳

太史公六國年表其叙秦之興曰量秦之兵不如三晉之疆也然卒并天下非必險固便形勢利也蓋若天所助焉或曰東方物所始生西方物之成熟夫作事者必於東南收功者常於西

北故禹興於西寇湯起于毫周之王也以豐鎬伐殷秦之帝用雍州興漢之興自蜀漢此殆類術家鄙誕之說信如此言則自漢以後若隗囂公孫述之徒竊據西土自謂天命可覲而繼以敗滅此又何也又曰論秦之德義不如魯衛之暴戾則秦不足法明矣而後云世異變成功大傳曰法後王何也以其近已而俗變相類議卑而易行也學者牽於所聞見秦在帝位日淺不察其始終因舉而笑之不敢道此與以耳食無

異悲夫則又嘆悼其所爲若足爲後王法程者
凡此皆遷學術偏駁識趣卑陋處昔人譏其淺
陋而少聞道此亦其一云

兩山墨談卷之十五

墨談

卷十五

古

兩山墨談卷之十六

吳興陳霆

孫仲益賀胡尚書手簡云玉堂視草金華進讀極儒者之榮其門人李學士祖堯註云金華殿名前漢史翼奉傳畧云孝文時未有甘泉建章及上林離宮又無鳳凰白虎玉堂金華之殿是也其援引殊不涉進讀事按史漢成帝命張禹等講論語於金華殿故後世以金華爲講讀之地孫所謂儒者之榮者用此也

墨談

卷十六

一

史記漢宗室傳齊王世家前云文帝十六年復以齊悼惠王子安都秩志爲濟北王十一年

景帝

年

吳楚反時志堅守不與諸侯合謀吳楚已平

徙志王菑川則志之本末詳矣繼復云漢擊破

賢

元藩

天子因徙濟北王志王菑川志亦齊悼

惠王子以安都侯王濟北菑川王反無後乃徙

濟北王王菑川凡此係事詞重複又列傳未建

事中具酈生首尾任敘事中叙張蒼始末謂宜

從刊改而諸篇中如是者乃疊出予固疑史記

爲太史公未脫藁之書也

越絕書不知作者誰氏或謂子貢子胥作者安也觀其援引不倫序次無法類謏淺者所爲而所記有及西漢時事者又其間文法間有類吳越春秋處其正言無幾而雜說旁出復疑古有是書後人從而勦入他說豈東漢之際如趙曄輩者所著耶其最不經者謂舜有不孝之行去辨歷山三年大熟身自外養父母皆飢舜父頑母嚚兄狂弟放考之經典孔孟皆稱舜爲大孝舜豈有外養之理四岳曰瞽子父頑母嚚象傲舜固未聞有兄也又謂子胥妻楚王之母吳越春秋載子胥入郢令吳王納昭之夫人然則子胥固未嘗身此舉也凡此皆有感於後之學者予故深闢之

墨談

卷十六

二三

說苑載周威公聞屠餘策其國亾而懼乃進錡疇田邑史理趙吳之賢去苛令三十九物以告屠餘餘曰其高終君之身旣後威公薨九月不得葬周乃分而爲二愚謂周分爲二之說劉氏

蓋以實威公身後之禍不知其事情實非也按
大事記考王封弟揭於河南以續周公之職是
爲桓公卒子威公立卒子惠公立惠公復自封
其少子班於鞏號東周君於是東西周分治是
時惠公欲獨擅河南之地故封班於鞏以奉王
爲名然則二周分治乃威公子孫並分王室之
謀在惠公則爲拓先業在威公則爲子孫大焉
者也

陶弘景二牛圖本出於莊子楚王聞莊周賢厚

墨談

卷十六

四

使迎之許以爲相周笑謂使者曰千金重利卿
相尊位也子獨不見郊祭之犧牛乎養食之數
歲衣以文繡以入太廟當是之時雖欲爲狐豚
豈可得乎子亟去無污我我寧遊戲污瀆之中
自快無爲有國者所羈二牛之意益用此

周書囚蔡叔於郭鄰以車七乘傳謂制其出入
而猶從以七乘之車或疑旣制其出入則何事
乎車而猶從以七乘不無背矣因引十乘百乘
之說謂古者以井地定賦車乘之數自井地而

出蓋四丘爲甸一甸爲田十六井所賦兵車一
乘以車七乘疑削其國邑而但給以七乘所出
之人土蓋古法七甸之賦也此說亦有謂然嘗
考周禮大行人副車之制謂天子十二上公九
侯伯七子男五蔡在周爲侯爵則七乘乃其平
時之從車有罪之後制其出入而從車則不革
姑且存其國儀侯度蓋寬假之禮也蔡氏失原
其本故學者他疑予特祛之

西廣左右江溪洞之外別有依山之蠻俗謂之

墨談

卷十六

五

山獠獠婦生子即出其夫則僉卧如乳婦少不
謹則致疾其婦乃無所苦

元延祐間佛昇國使來朝備言其城當日沒之
處地有水銀海周圍可四五十里國人取之
法先於近海十里掘坑井數十然後使健夫駿
馬皆貼以金薄迤邐行近海日照金光晃耀則
水銀滾沸如潮而來勢若粘累其人即迴馬疾
馳水銀隨後趕至若行稍緩則人馬俱爲水銀
撲没人馬旣迴速於是水銀勢漸遠力漸微却

復奔回遇坑井則水銀溜積其中然後旋取之
用香草同煎則花銀矣水銀中國亦產固非奇
物術士輩往往煉之爲藥銀然畢竟是假若彼
國前而爲花銀是殆其草藥之靈異也

唐末方鎮類以讐報誅欲爲事而李茂貞之子
從曦獨以仁厚爲政鎮人愛之其在鳳翔有田
千頃竹千畝懼侵民利未嘗省理從征王蜀部
送王衍還至鳳翔監軍使柴重厚拒而不納明
宗入立知其故遣人誅重厚從曦上書言重厚
守鳳翔軍民無所擾願貸其過此其識度誠長
者當時節使罕復及之然以其茂貞之子故但
附其事未至不免爲雜傳中人殊可惜也

史記武王克商紂反走登于鹿臺之上蒙衣其
珠玉自燔而死武王入商至紂死所自射之三
發而後下車以輕劍擊之以黃鉞斬紂頭懸太
白之旗世儒多謂紂雖殘賊死則已矣武王之
師固曰公天下之怒然弊寇新復亦須少動于
中豈有於其已死之屍而復加戮之理予謂此

言眞足以正史遷采擇不精之失非以存世敦而曲爲之辯飾也又傳記謂太公蒙面而斬妲己今按武王至紂之嬖妾二女二女皆經自殺武王又射三發擊以劍斬以玄鉞懸其頭小白之旗所謂嬖妾盖妲己也二女非謂紂所出乃妲己與其並嬖者如傳云二女裸之謂妲己素慧黠意其當紂死之時必自計不免而預爲之所寧肯坐俟周兵之入而致其生獲哉然則此云二女皆經自殺揆之事理謂獨可信耳

後唐明宗史謂其胡人目不知書然其所見亦自高卓有帝王知書好文者所不可及秦王從榮嘗侍側明宗問曰爾軍政之餘習何事對曰有暇讀書與諸儒講論經義爾明宗曰經有君臣父子之道然須碩儒端士乃可親之吾見先帝好作歌詩甚無謂也汝將家子文章非素習必不能工傳於人口徒取笑也吾老矣於經義雖不能曉然尚喜屢聞之其餘不足學也凡此數言但知帝王爲學之要比與專務詞章筆札

與臣下較能否者異矣其君主天下亦非偶然也

五代史梁本紀六月揚崇本復附于岐王乃以兵如河中聲言攻崇本遣朱友恭氏叔琮蔣玄暉等行弒昭宗崩十月王朝于京師殺朱友恭氏叔琮昭宗崩下當補書太子祝即位是爲昭宣帝下方云十月王朝于京師然後事詞爲備本紀叙朱溫事雖於唐可畧然昭宣之立不著其始則其下二年七月天子使來賜王迎鑾紀功碑者當爲何人所造耶此非惟迷誤後學亦事理之必不可闕者也

墨談

卷十六

八

說苑載曾子有疾孟儀往問之曾子曰烏之將死必有悲聲君子集大辟必有順辭禮有三儀知之乎對曰不識也曾子曰坐吾語汝君子脩禮以立志則貪慾之心不來君子思禮以脩身則怠惰慢易之節不至君子脩禮以仁義則忿爭暴亂之詞遠若夫置罇俎列籩豆此有司之事也君子雖勿能可也按此載曾子告孟儀一

節與論語曾子告孟敬子者特相侔中間意向雖參置不類然不妨於大旨之畧同也豈二書所出爲即一事而見聞之下記之者不能無異耶然就文義而論則論語所記爲渾然而向所云云微傷于峭露要之賢人之言與文人之詞自昔有間矣

予喜聞前代之故一日閱宋遺民錄得宋元以來數事意好事者所欲共聞也漫疏于左理宗在宮中嘗被酒上芙蓉閣聖淮楚之分黑祿十

墨談

卷十六

九

有餘年不散南徇江乃淒然淚下度宗在宮中日以酒壺自隨終日酣醺外事蒙蔽厓山之敗陸秀夫抱祥興帝于懷以匹練束爲一體仍以黃金礮腰間乃赴水死文丞相既俘其夫人歐陽氏爲元將所執將逼而辱之夫人曰吾有死耳誓不以潔白之軀辱於賤卒我夫不負國我獨安忍負夫也遂自剄死汪水雲元量舊以琴入內供奉三宮北狩乃隨至燕山時爲太皇及王昭儀鼓琴奉卮酒又或至文丞相狼獾之所

爲作拘幽十操文山亦倚歌而和之暨後南還
舊宮人會者十八人釀酒城隅與之別援琴鼓
再行淚各南下歸而爲黃冠縱浪山水人以爲
仙德祐入元封瀛國公世皇遇之甚窘凡五年
不給衣糧至文丞相死後乃給世皇夜夢黃龍
以爪纏繞殿柱厥明瀛國來朝正立柱下因是
謀欲去之而瀛國先覺乃祈于帝師獲爲僧以
自免虞伯生風儀整潔或謂其嘗私於文宗之
妃故當時無名子贈詩有不堪回首昭陵道落
日西風莎草寒之句順帝駐應昌以荆疾殂倉
卒梓宮無備乃取西江寺梁木以供用梁間隱
隱有西江月一調所謂死在西江月下也凡是
數事皆予前此耳目未及者是不獨可錄爲談
助雖以備史氏可也

宋建炎中高宗子明受太子粵卒續綱目從恒
辭不詳其故蓋國史諱之耳初苗劉逼高宗禪
位乃立皇子粵改元明受張德遠諸人勤王變
輿返正以明受嘗奸帝位建議去之竟連其乳

母掩之鐵塔之下後高宗之嗣晚年抱嬰思之
恨頗怒德遠然德遠之處此亦太過矣高宗嘗
謂輔臣云朕性不喜與婦人近此未必本性誠
然先是高宗在維揚方宮中有所幸御忽報粘
罕兵至遽驚惶出奔致成痠疾以是嬪御希進
其終於無嗣者坐此也

明受事出
朝野遺記

胡邦衡乞斬秦檜疏云區區之心願斷三人頭
竿之藁街然後拘留虜使責以無禮按三輔黃
圖云藁街在長安城南門內舊有蠻夷邸若今

星談

卷上

七

之鴻臚館然邦衡時以虜使在邸故請斷檜首
懸之彼所于以伐其狡謀而絕其和因引藁街
爲言然則藁街非尋常梟首之市也程克勤平
逆頌云吉祥就磔欽首懸竿藁街闐闐都人快
觀又正德甲戌間江西擒獲剽盜王浩八等檻
送京師法司論擬

上請有云宜懸首藁街以昭國法予謂曹欽浩
八等本賊亂于中國於蠻夷無所交涉而亦引
藁街之文未免於用事之誤也

按懸首藁街本
起於西漢斬獲

鄧文單于甘
延壽請爲此

宋靖康之難粘罕駐軍青城欽宗出狩留而未
返時有汪若海者以太學生上書粘罕請息兵
講好奉還少帝其書慷慨激發反復數百言中
有云語曰下令如流水之源順人心也元帥亦
知人心之所歸乎昨南門之下有一老父年且
九十偃僂扶杖揮淚而言曰我生之初尚及仁
宗我生之末乃遇聖君因聖行在而願衆曰今
上寬仁侶仁宗汝等當以死事吾老無能爲也

墨談

卷十六

十一

今日當先死以爲諸公勸城中聞之不問老少
無不歔歔流涕皆曰有君如此何忍負之人心
如此天意可知元帥豈可不承于天不和於人
哉云云粘罕雖不聽然亦不罪也當時圍城中
大小臣工噤不敢出一語而忠義奮激乃出於
一儒生里父則平時肉食以謀人之國者果何
如人哉若海後仕宋亦不顯高宗嘗以片紙書
其名諭張德遠曰侶此人材卿宜收拾會浚去

國不果召

新安程克勤嘗預脩續通鑑綱目其於文宋瑞
陸君實死節書文爲樞密使陸爲簽書院事謂
一以填海錄等書爲據予前旣論之矣始君實
居厓山時日記二王事爲一書甚悉以授禮部
侍郎鄧光薦曰君後死幸傳之後厓山平光薦
以其書還廬陵大德初光薦死其書存亡無從
知故海上之事後罕能詳者今得填海錄閱其
間數事與番禺客語行朝錄等書參差不協是
知此書不無舛誤計非陸記手筆之比程氏乃
據以廢正史不知其何見也

偶閱荊州府志載夷陵州有浣紗河其說云昔
伍子胥奔吳道過浣紗女卽其地也其水色斑
白若浣紗之色後人立子胥廟于此按吳越春
秋伍員初逃楚難聞太子建在宋奔往就之旣
而奔鄭會鄭人殺建乃與建子勝奔吳越昭關
至江漁父渡之遂行入吳疾於中道乞食溧陽
會女子擊綿於瀨水之上宮中有飯女子長跪
而與之子胥已餐而去顧謂女子曰掩夫人之

壺漿無令其露女子嘆曰嗟乎妾獨與母居三
十年自守貞明不願從適何宜饋飯與丈夫虧
越禮儀妾不忍也乃自投于瀨水而死後員入
郢而還過溧陽瀨水之上欲報女子以百金而
不知其家乃投金水中而去又按張勃史記註
子胥乞食處在丹陽溧陽縣丹陽爲今應天府
溧陽其屬邑也邑有投金瀨緣伍員投金而得
名唐時立貞女祠其上李太白爲之記詳見是
前卷子胥遇浣女之地諸說之可據無疑也若夷陵

則春秋楚之西境其西北乃適秦入蜀之路槩
之於吳風牛馬不相及子胥何緣至是耶或者
水色類於浣紗好事者因謬倡浣紗女之說然
則援以立廟而據以入志惜亦甚矣

宋紹興中與金人議和時淵聖在虜中尚無恙
也自後太后迴鑾而淵聖竟不返初疑金人欲
留以爲質宋雖有請彼或靳而未許今閱朱子
語類窺見其間一二乃知淵聖之歿於虜蓋有
深故也先是兀木下江南頗屢失利而張通古

之來朝之忠計者憤不肯和宋勢蓋稍振矣是時劉豫既廢金遂欲立淵聖於南京以中分宋勢賴和定而止暨太后南旋淵聖卧車前泣曰歸語九哥與丞相幸早歸我我得太乙宮使足矣他不敢聖也太后許之且與誓而別及歸而知朝議大不然遂不敢語自明受太子班高宗竟之嗣金人又欲立淵聖之子以變動江南耳目岳武穆嘗具劄言之故終淵聖在虜宋遣巫及一迎之後不復終請者慮其狡謀復起而至不可區處也後逆亮謀掃國南下目中已無宋矣而淵聖在彼終以前議致疑慮生他變故先舉戕之此殆南北一大機事也惜作史者不能畧示其槩故筆之以詔來者

兩山墨談卷之十七

吳興陳霆

鬻子書二十二篇秦火之後漢藝文志謂止存六篇今閱迳行珪所註者乃有十四篇按鬻子名能年九十見周文王王曰嘻老矣鬻子曰使臣捕獸逐麋誠老矣使臣坐策國事尚少也王乃師之然則鬻子商末人也度至周公封魯之時必已死今其書有曰昔者魯周公曰吾聞之知善不行謂之狂知惡不改謂之惑又曰昔者魯周公使康叔往守於殷觀此二節則鬻子應至武王末年尚存然則湏年百一十以上豈有耄荒若此而復能著述耶故疑其書非鬻子自作蓋東漢以後好事者掇拾其語而彙集成篇者也不然漢所存止六篇而今至十四篇之廣安知非後人附益哉

元伯頽率師伐宋世祖以曹彬下江南諭之其至臨安駐軍城北戒飭將士帝無剽掠民無震擾遣人諭幼主降次收圖書法物然後借其君

臣以北從容間雅有古良將之風雖其夷虜習
性姬之曹彬終未全美然視粘罕兀木輩則霄
壤矣嘗見其還經金陵梅嶺崗詩云馬首經從
嶺島歸王師到處悉平夷檐頭不帶江南物只
插梅花一兩枝其自誇如此若非口不言功者
所宜然即此觀之有古人行李蕭然圖書數卷
之况味其清致雅尚殆非夷狄中人物也

綱目載魏相田文吳起不悅謂文曰請與子論
功可乎文曰可起曰將三軍使士卒樂死敵國

墨談

卷十七

二十一

不敢謀子孰與起文曰不如子起曰治百官親
萬民實府庠子孰與起文曰不如子起曰守西
河而秦兵不敢東向韓趙竇從子孰與起文曰
不如子起曰此三者子皆出吾下而位吾上何
也文曰主少國疑大臣未附百姓不信方是之
時屬之子乎屬之我乎起默然良久曰屬之子
矣呂氏春秋載吳起謂商文曰事君果有命矣
夫商文曰何謂也吳起曰治四境之內成馴教
變習俗使君臣有義父子有序子與我孰賢商

文曰吾不若子曰今日置質爲臣其主安重今
日釋璽辭官其主安輕子與我孰賢商文曰吾
不若子曰士馬成列馬與敵人敵人在馬前援桴
一鼓使三軍之士樂死若生子與我孰賢商文
曰吾不若子吳起曰三者子皆不吾若也位則
在吾上命也夫事君商文曰善子問我我亦問
子世變主少群臣相疑黔首不定屬之子乎屬
之我乎吳起默然不對少選曰與子夫是二說
即一事也而爲語不同其頗協者最後文之言

畢談

卷十七

耳綱目稱田文而呂紀爲商文所不可曉綱目
本之通鑑類非無據而呂紀則先秦之書要之
於紀載爲信也二者未易稽決

宋弘在漢其可取者非直貴不改文富不棄妻
兩言而已其隨事規益有古大臣蹇諤之風弘
薦桓譚爲議郎譚於宴鼓琴以繁聲悅帝弘召
而讓之曰吾所以薦子者欲令輔國家以道德
也今數進鄭聲以亂雅頌非忠正者也能自改
耶將令相舉以法乎譚頓首謝良久乃遣之他

日帝使譚鼓琴譚見弘失其常度帝怪而問之
弘乃離席謝曰臣所以薦桓譚者望罷忠正以
導主而令朝廷耽悅鄭聲臣之罪也帝改容謝
又弘嘗讌見御坐新屏風圖畫列女帝數顧之
弘正容言曰未見好德如好色者帝即爲撤之
凡此讜言直氣蓋與申屠嘉汲長孺相望而與
者而通鑑節要乃不能畧載小生末學能知者
或鮮矣子故表而出之

李筠謀起兵拒宋其子守節仕宋爲皇城使嘗

墨談

卷十七

四

泣諫不聽太祖知之遣守節歸諭旨筠謀愈甚
遂起兵命守節守上黨引兵南向後事敗自殺
守節以上黨降詔釋其罪以爲團練使子謂守
節處此誠亦難矣蓋違父則非孝拒君則害忠
然而父死家滅已獨獻城而丐生則於義有未
盡也昔楚人將殺令尹子南子南之子棄疾爲
王馭士王泣而告之既殺子南其徒曰行乎曰
吾與殺吾父行將焉入然則臣王乎曰棄父事

讐吾弗忍也遂縊而死李懷光將及其子李璀

言於德宗曰臣父必負陛下願早爲之備臣聞君父一也臣父非不愛臣臣非不愛其父與宗族也誠使臣賣父而求生陛下亦安用之及懷光死璿亦自殺守節而知此義則宜於見討之際束手歸命以全君臣之誼而一死從筠地下以全父子之倫君親之際豈不兩盡也哉而隱忍偷懦自乖大義二子之罪人矣

冬青引載於野史其詩凡三出而語句不同初疑好事者誦錄之誤近閱趙東山跋語與宋遺

墨談 卷十七 五

民錄乃知唐王潛林景曦收葬陵骨之後謝翱皋羽與景曦各爲詩以暗記此事故不同如此獨一首之末云君不見大之年羊之月劈震一聲天地裂不知何意予聞楊禿所營浮圖凡三經雷震最後乃焚其金粟之尖頂若瓠壺者所謂劈震一聲意指此也楊禿襄陵骨雜牛馬諸骼爲浮圖以壓之號曰鎮南而不知龍輓之餘先已爲唐林二義士所得托固於萬年枝之下至今尚無恙也元人徒疑江南王氣未泯而况

禿所爲若曰壓襪云者適足以當其心故任其
恣肆妄作若罔聞知然人憫于下而歛其遺天
怒于上而伐其跡亦足以觀宋德之格于上下
者矣昔人錢塘懷古詩云劫火不燒揚璉塔怒
風遠激伍胥潮蓋業塔不燬則江怒不息其不
平之氣終古如在載考鎮南之跡元人謂在杭
之興元寺寺故宋大內也今杭之鳳山門外雖
諸寺畧存然不知何者爲興元且改世以來街
陌變遷漫莫尋遺塔之跡意者 國初修復城

墨談

卷十七

六

隍之際有識者惡之特刻去之耶俟當細訪

謝疊山跋程楚翁詩卷云五帝三王自立之國

至德祐而滅有天地以來無此變也理之變氣

隨之西北巖疑之氣盛行于東南吾序陳月泉

詩已言之後六年而驗又十一年程楚翁出詩

一編氣清和而志深遠有風人遺音獨以爲王

澤未竭民彞未泯豈與文士蜚角巧也楚翁毅

然以天地大義爲己責死生禍福置之度外幾

殆撈箕幸逃鋸鉞浦播十年本志弗渝豈不真

男子哉黍離忠矣義氣不足以感人無衣勇矣
忠誠不足以悟主周轍不西千古同恨安得楚
翁之詩作於彼時乎云云楚翁徽之婺源人性
倜儻喜問學德祐末元兵入臨安江東列郡皆
下楚翁發憤散家貲陰結敢死士將復郡城事
泄被執擄掠幾死夜賂守者得脫去時碧梧馬
丞相廷鸞在番陽義不仕元楚翁往投之碧梧
義其爲人贈以詩云汗竹丹鉛側空花粉黛中
尚懷丞相亮不署大夫雄有客來今雨誇予邁
古風幽情傾不盡渺渺碧雲東楚翁客碧梧所
久之聞謝疊山在閩中去就疊山奔走往來凡
十年間閱險阻一寓于詩有黍離麥秀之感讀
之令人涕下疊山被執北去楚翁悵悵無所依
病逆旅中以死其所著述經兵燹後無一字存
惜嗚可惜然楚翁雖不幸而碧梧之句疊山之
語則炯然在簡冊間身名固不朽矣

說苑具載智伯與趙襄子戰于晉陽下而死智
伯之臣豫讓乃漆身變形吞炭變聲襄子將出

豫讓爲爲死人處於梁下駟馬驚不進襄子動
心使視梁下得豫讓襄子重其義不殺也又盜
爲抵罪被刑人赭衣入繕宮襄子動心則曰必
豫讓也襄子執而問曰子始事中行君智伯殺
之子不能死還反事之今乃欲殺寡人何與先
行異也讓曰中行君衆人畜臣臣亦衆人事之
智伯朝士待臣臣亦朝士爲之用襄子曰子非
義也乃壯士也乃自置車庫中水漿母入口者
三日以禮豫讓讓自知遂自殺也按讓本傳趙

襄子殺智伯漆其頭以爲飲噐豫讓欲爲報讐
乃變姓名爲刑人入宮塗廁欲刺襄子襄子如
廁心動執問刑人則豫讓左右欲誅之襄子曰
彼義人也吾謹避之耳旣去頃之襄子當出豫
讓伏于所當過之橋下襄子至橋馬驚曰此必
豫讓也使人執之乃喟然而嘆曰豫子子之爲
智伯名旣成矣而寡人赦子亦已足矣子其自
爲計於是讓伏劍而死據此則讓之自殺乃在
伏橋之後說死序諸入宮之時微爲舛錯又讓

之言曰中行以衆人畜我我亦衆人事之智伯以朝士待我我亦朝士爲之用昔人謂即其言而繁其中則讓固懷貳心者矣何天下後世之足愧也然觀襄子謂讓曰子非義也乃壯士也則讓之本心在當時已爲識者所非矣後世之論蓋落第二太史公傳之刺客無亦有見于是哉

元章祖程白石樵唱詩註謂元兵滅宋僧人揚總統發宋諸陵以其骸骨棄草莽中適林霽山

墨談

卷十七

九

在越上痛憤不能已乃詭爲采藥者以草囊拾而收之又聞理宗髓骨爲北軍投湖水中因以錢購漁者求之幸一網而得乃盛二函託言佛經葬于越山之北且種冬青樹識之又匡山志元人發宋諸陵以其骨沉諸水政和縣人余應則亮網之得理宗髓骨而葬焉按輟耕錄元發宋陵以其骨雜牛馬諸骸作浮圖壓之號曰鎮南有唐玉潛林景熙者私以他骨易出之各爲匣以葬初未聞則亮爲此舉也始陵發後理宗

獨夫其頭醴蓋胡僧竊之製為飲器胡俗以得

為鉢孟則吉祥如意故為此至我

太祖登極 命宣國公索于元庫久之得于西僧

汝訥所救有司葬之聚寶山後越郡以宋七陵

圖來獻

上覽之惻然命返舊骨于元穴凡理宗體骨其

始末有據如此今日曰林景熙網得以葬又曰余

則亮網得以葬夫景熙固嘗預葬骨之舉此猶

可說若則亮則元末人何緣預世祖時事哉此

墨談

卷十七

十

誠好事者傳聞之詞皆未足憑也

李賀榮華樂云為肩公子二十餘齒編具唇繳

朱走馬夜歸叶嚴更徑穿複道遊椒房或謂椒

房乃宮禁嚴密之地非公子可夜遊者按此篇

本詠梁冀事冀為人為肩對目所謂為肩公子

指冀也本傳冀大起第舍而妻孫壽亦對街為

宅殫極土木互相誇競堂寢皆有陰陽與空連

房洞戶柱壁雕鏤加以銅漆窗牖皆有綺踈青

瑣圖以雲氣仙靈臺閣周通更相臨望飛梁石

澄陵跨水道金玉珠璣異方珍怪克積藏室遠
致汗血名馬又廣開園囿採土築山十里九坂
以象二嶠深林絕澗有若自然奇禽馴獸飛走
其間冀壽共乘輦車張羽蓋遊觀第內多從娼
妓鳴鍾吹管酣謳竟路或連繼日夜以騁云云
觀此則冀之宅第視宮禁蓋等矣所謂椒房
非當時僭擬無度壽之房闈亦用椒壁之制而
自同於內庭之稱耶然則賀之言正以著冀驕
侈之極於宮禁初無預未可謂失也

墨談

卷七

十一

九峯蔡氏謂三代改正朔不改月數其言曰三
代雖正朔不同然皆以寅月紀數蓋朝覲會同
頒曆授時則以正朔行事至於紀月之數皆以
寅爲首也愚謂夏非改正商不改月周則改正
以示統改月以隨正其在經傳如春秋所書頒
霜無冰雨雪震電之月孟子所稱七八月歲十
一月十二月左傳正月辛亥日南至之文汲冢
周公作周月惟一月斗柄建子之語皆其証也
我朝周洪謨氏作周正辯疑一主蔡氏力辯

周人未嘗改月其謂春秋所書尼因事而繫月者皆夏時也定元年冬十月殞霜殺菽僖三十三年冬十二月殞霜不殺草則謂二霜以過殺與不殺而書桓十四年正月無冰成元年二月無冰則謂二冰以正月無可藏與二月無可出而書桓八年冬十月雨雪謂雨雪之上恐有缺文或有大字隱九年三月大雨震電則謂建辰之月雷雨三日以爲非常過度故繫震電于大雨之下他如七八月旱者決在孟仲秋之交十

一月十二月杠梁成者斷在歲終之候其援引証據自謂無可疑矣而不知皆其說之師心者也且周之改月不獨愚見爲然宋元諸儒蓋言之不獨諸儒爲然程朱大儒亦言之周氏能逞其辯于春秋孟子固矣獨其引汲書則節去周公作周月惟一月斗柄建子之文於左傳所紀正月辛亥日南至之類則謂周末世亂道路榛塞左氏不知周制而妄爲之說夫其節汲書者固欺人之失而謂左氏不知周制則幾于妄矣

蓋左氏魯之史官其傳春秋雖不無可駁要之於周之曆紀亦難乎謂其不知也雖然周氏尚以孝經宗祀明堂之文爲不足據則其所取信者惟己意而已矣他何言哉

正德未申間狂賊劉六劉七輩嘯聚十餘萬衆殺掠齊魯之境一日次東平州州有一嫂二姑避賊出奔遇其部將于道度勢不可脫即跪俟道左賊悅其色逼至莽地欲次第污之時賊大衆已起營獨所遇賊未捨去嫂不得已聽所爲

墨談

卷十七

十三

次及大姑姑俟賊上體即兩手交按賊頸小姑以死踞其身賊時已疲作力不能起嫂即其刀砍其首斃之往報之官準格給賞時皆壯之予讀楊鐵崖濮州娘樂府因知薛花娘之事非誣飾者花娘濮州娼也賊朱鬢者掠之因與裸飲賊既酣擁花娘卧花娘乘其睡抽佩刀刺殺之乃遁出報官兵因遂進攻盡擒其衆東平婦之事大畧類此然花娘斃賊於醺酣而三婦乃斃賊於倉卒此尤竒快也作三婦制一虎繼濮州

娘之後一虎哮三婦怖以吡三婦順一虎疲以困虎生獰嗜慾亦其性幕天不醜裸人國席地寧知陷身穿按虎頸踞虎腰虎雖有力不得跳肉屏未竟聚磨樂血顛已落屠猪刀嗟嗟三婦非五虎胸次沉機乃雄武爲君寄謝晉男子下車攘臂習何數

張士誠亾國亾於其弟士信士信佐其兄僞稱丞相信用匪人群小趨徭卒之內乏謀畫之臣外鮮折衝之將邊威不振國計坐耗以迄于亾

墨談

卷十七

十四

士信於丁未六月六日爲天兵用砲擊死所任隆平郡太守周俛本山陽鐵冶子以聚斂功至上卿伏誅日緩頰言曰錢穀鹽鐵等籍皆在我汝國欲富當勿殺我主者怒曰亾國賊不知死罪尚敢言是耶速殺之吳人稱快或手加額曰今日天眼開也有蔡文者山陰人素業醫葉德者雲陽人業星卜士信皆委任之二人無他才能惟以諂諛悅士信意汲引邪佞排譖蹇諤致士信誤國大抵二人力也丁未春獲至臺城

伏誅因風乾其屍懸示于秤者一月又潘某者其偽駙馬也性驕侈娶美娼凡數十內一爲蘇氏才色兼美醉後尋其罪殺之以金盤薦其首于客宴國亾伏誅臺城投其首于溷張氏始末雖畧見於輟耕錄歸田詩話等書然未詳備茲偶得其數事于此俟他日有聞輯爲傳云

兩山墨談卷之十七

墨談

卷十七

十五

兩山墨談卷之十八

吳興陳霆

宋觀察使汪介然傳元人汪幼鳳所作中載洪忠宣皓陷虜高宗用其子适爲相屢書求皓虜以不知所在爲辭及介然使虜遊城上皓聞笑語曰南音也密附蠟丸書介然剖股納之歸聞于朝帝召見介然於御前取書以進上覽之涕泣命适拜公爲之厚餉和議成明年洪公皓朱公弁張公邵皆南還洪公又令諸子孫羅拜之曰微夫人之力不及此後适出知徽郡爲介然建府第朱文公誌朱弁墓謂得邑人汪介然密附洪公皓蠟丸之功即此也介然冒危險以通國之好守貞信以不負人之託其志節可傳無疑獨考洪适以孝宗乾道元年始入相是時忠宣歸朝歿已久而此云高宗用其子适爲相屢書求皓則爲說荒謬不考之過也

予前辭楊璉所營鎮南浮圖入國朝來無跡

可訪意謂國初刻去此但一時據理勢而言

未暇考求其據也今按元史續編至元二十二年秋九月上命建佛塔于宋故宮二十五年載西僧揚璉眞加以宋宮室爲塔一爲寺五元人陳剛中鳳凰山詩云浮屠百尺聳亭亭落日鴉啼野蔓青至國初貝瓊穆陵行云流螢夜飛石虎殿江頭白塔今不見是鎮南在元固屹然存而入我朝方氏此則國初剷去之明驗也以此例之乃知天下古今之事其不得親擊者以理勢推之率十中八九又楊髡建塔本爲

璉壓陵骨之計然發陵之歲月續綱目據唐王

潛傳謂在至元十五年十二月元史續編謂在二十一年九月周草窻謂在二十二年八月今觀續編載二十二年九月建佛塔于宋故宮則與草窻所誌發陵月日相繼以是年八月發陵而九月建塔事理相因最爲脗合草窻宋末人也其所紀誌當爲實錄若續編載二十一年發陵越明年九月始建塔則不應陵骨暴露一年之久至如玉潛傳載歲戊寅十二月發陵越七

日下令褒陵骨築塔則與續編建塔之歲月違背凡八甲子此足以決其謬誤也

三國之統系陳壽帝魏而寇蜀司馬公因之未晦廢矯其失乃帝蜀而賊魏自朱子迄今未有置異說者也並朱子時有俞文龍者作孔圖論一篇大抵考論先主孔明之跡而吹尋其過此未暇論至郤如幾魏春秋之作則與朱子之見大異矣如幾字維心太永人徙居德清之龜溪從葉石林諸名公游以陳壽三國誌紀載無法

學談

卷十八

三

乃作魏春秋仍以魏紹漢統張無垢九成與相善移書難之復書曰僕不能超時媚世守所學至於窮且老因刊正三國之書以度余日辱賜教疑其予操而黜備衰病居山無緣面究欲置不報恐閣下終疑不解敢申其說商系夏周系商秦系周漢系秦魏系漢晉系魏綿綿系而不絕者謂之統若以魏篡取黜不使系漢則統其絕矣春秋列國之君雖篡殺而取者皆得承其統聖人不沒其實所以著其非也司馬遷作史

記畧準春秋至秦項呂氏亦皆列之本紀僕作
魏本紀非予之也法應然也董卓之亂王室覆
蕩獻帝曹陽之敗六宮委棄於塗泥百官餓死
於墻壁自古播遷危辱無甚于此而山東諸侯
以義名師擁據睥睨莫或有惻然動心者操獨
奉迎都許披荆棘立廟社使如綫之緒絕而復
延雖其心不可得而量抑亦有功于漢者春秋
僖公二十八年天王出居于鄆書曰公朝于王
所及天王狩于河陽又書曰公朝于王所公朝

墨談

卷十八

四

而諸侯不與所以譏諸侯之不臣也司馬溫公
謂操取天下於群盜之手非取于漢深亮其亾
漢者非操之罪僕猶不敢以爲然蓋操實攘而
有之罪安得而掩哉至如殺孔文舉弑伏皇后
與夫受禪之文陳壽所畧陳者僕皆特書而詳
志之不沒其實以暴其罪爲萬世亂臣賊子之
戒黜之之旨不爲不嚴獨表其奉迎一節以厲
後世臣子臨艱危不可以棄其主耳至論其心
則曰學古而任數外夷而中險舍小怨以矯情

引大義以飾詐情其畧有餘而度不足其非而黜之者如此亦竒得其情矣未嘗予之也若曰魏篡而有之不當參漢則非春秋之法也噫漢亾宗室布在天下惟虞表璋備耳虞表旣敗璋又失國幾其奮起而興劉氏者舍備其誰哉墜之深故責之切方曹陽之敗臣子有不可爲心者備時爲將軍領豫州刺史擁重兵據方面其勢足以自通其言足以動衆曾不聞馳一介之使脩常貢之職言顛沛訪在亾亦未嘗出一詞

陔異談

卷十八

五

以激漢之義士果有意於興漢乎謂其長者長者固如是乎厥後獻帝密詔使之圖操備與操方昵出同輿坐同席非不得其便也畏不敢發事覺兵敗乃連於素結紹何如人哉紹破往依劉表至是始得其謀蜀之計於諸葛亮夫荆益同姓之邦使備與之協和與幾或可以興復也春秋伐同姓者貶其爵而人之滅同姓者絕其類而夷狄之且璽厚禮迎致使平漢中漢中蜀之咽喉也備苟不急於自爲籍益州之兵食討

平張魯而扼其咽喉孰不壺漿以迎師璋將遜避之不暇矣備不知出此乃背恩棄義反襲而奪之長者固如是乎昔光武破尋邑討王郎降銅馬救斯民於塗炭然後即位改元故中興之功照耀往策備於漢無纖毫之功滅同姓而乖義舉納宗婦而亂人倫亟欲稱尊告祭天地託流言爲獻帝舉哀定謚而帝尚無恙也騁區區口舌以誣群聽一皆出於變詐無足取者操有無君之心猶畏名義終不敢自尊備有所畏乎

閣下唾操而不知備有可唾者如此僕爲之賢曰任智勇以爭天下之勢仗信義以歸天下之心此高帝之所以創業世祖之所以中興也備之智勇信義何如哉蓋未有智勇不具信義不立而得志於天下者也僕所聖備者深矣必欲以蜀系漢不知蜀亾系之魏也系之晉耶又莫適攸從也其去取大旨如此予嘗反復其所言而考究當時始末亦足以表暴操之功罪而愧赧乎先主之心其言要自有謂不可盡棄也

昔歐公作五代史判公惜其不脩三國誌因囑東坡爲之坡恐世間議論不一避而不承然則昔賢於此正自難言耳

我朝遷鼎北平雖

成祖弘規遠畧然本

太祖之意也洪武改元

駕御謹身殿顧問廷臣曰北平建都可以控制胡虜而運掉東南比今南京何如衆對曰胡主起自沙漠立國在燕今已百年地氣天運已尽

墨談

卷十八

七

不可因也今南京興王之地宮闕已完不可改圖傳曰在德不在險也於是中止昔武王克商謂周公曰我嘗南望三途北望岳鄙顧瞻有河粵瞻洛伊母遠天室營周居于洛邑而後去繼而武王崩志不克就成王立周公追繼先志卒營洛以爲成周東遷之後保固守險綿延周祚於八百年之末非細故也今

國家控據上游而宰制六合建帝王萬世不拔之基則

成祖繼志之孝

聖子神孫迂衡之休也

予著撮義載宋高宗駐蹕維揚金師入寇將渡淮適招信縣一尉時以巡徼遇之途遂相敵是日風作塵氛蔽天虜不測南軍尋寡相拒踰半日尉以力戰死高宗因得飛報倉卒渡江不尔則有可慮者然尉之名氏失傳記者爲之嘆惋偶閱續通鑑載建炎三年金人由招信將渡淮縣尉孫暉禦之沉其數舟虜以疑兵縻暉自上流渡城破暉死之此事正與傳記昭合然則尉乃孫暉耳其脫君父於貼危忠績匪細

樂記一篇竊嘆其高深道古非秦漢文字可並致堂胡氏謂爲子夏所述或又謂子貢所作然皆無可經據愚意此或夫子所示意門人商賜董述以共成者也

猴詩謂之孫性躁而彘智嘗記唐大曆中有猴數百集古田杉林中里人欲伐木殺之中一老猴忽躍去隣近一家縱火燔屋里人懼亟走救

火於是羣猴遂脫去其狡智若此載汀州志
徐敬業起兵誅武后不克而死武因勦滅其族
論者謂高宗之立武氏決於徐勣一言然未幾
徐氏族滅亦足爲其禍唐之報偶讀唐書乃知
勣之後蓋未及滅也按吐蕃傳虜將徐舍人者
語所俘道人延素曰我乃司空英公裔孫也武
后時吾祖以兵尊王室不克而覆子孫奔播絕
域今三世矣我雖握兵心未嘗忘歸顧不能自
拔耳是勣之子孫故在亦足爲敬業忠義之報
也

墨談

卷十八

九

周書有君陳篇王伯厚以君陳爲周公之子伯
禽之弟見坊記註然註之所本它無所攷

宋時瀘南人有蓄秦吉了者能作人言夷酋欲
以錢十萬買之其人告吉了以貧甚欲賣以濟
困之故吉了曰我漢禽也不願入蠻夷山因不
食而死此與壓山墜水之白鷗正相類彼含齒
戴髮名爲士大夫者顧叛宋而投金元曾禽若

哉

曆法日行之度北至東井去極近南至牽牛去極遠東至角西至娄是爲春秋分先儒言北至東井南至牽牛此南北以在天者言東至角西至娄此東西以在地者言今按東井牽牛之南北蓋主北極而言北極位東井之北日自牽牛而北至于東井則去極爲近而於時爲夏至日自東井而南至于牽牛則去極爲遠而於時爲冬至然此南北必人從地面仰觀于天推考其進退遠近乃得而見故曰南北以在天者言也

若東角西娄則主方位而言蓋二十八宿有一定之位角亢七宿居東奎娄七宿居西日行適東井牽牛之中在東而至角則爲春分在西而至娄則爲秋分然此東西是蓋一定之方人於地中左觀右顧一望可見故曰東西以在地者言也

天地之祭莫大於郊舉郊則后土之祀六宗之禋皆在中矣百神之祀莫先於社舉社則山川之望群神之徧皆在中矣故中庸言郊社之禮

而承以祀上帝之言蓋舉天帝之尊以統其餘也五年之祭莫殷于禘舉禘則比年小禘三年大禘皆包之矣四時之祭莫備于嘗舉嘗則春夏禴祠歲終禘蒸皆可推矣故中庸言禘嘗之禮而承以祀先之言蓋舉廟祭之盛以該其餘也

置閏之法其先則三年一閏者三繼以兩年一閏者一續又三年一閏者三繼以兩年一閏者一如是經七閏然後天日月相會之氣朔無欠

墨談

卷十八

十一

無餘是爲一章所謂兩年一閏即五歲再閏之說也又曆家必於三十三月左右方置一閏然補前借後必各得一月之半則後月節氣乃在此月之中而中氣不在其月於是乎閏在矣是固天然恰會當此之置閏非人可移前徙後強置之於所不當之月也然則先儒所謂置一閏而有餘則留所餘之分以起後此固可通而謂置兩閏不足則借下之日以終數者於法窒矣按先儒倡借下終數之說由人誤認三年一閏

之後即繼以兩年一閏之文也

成湯放桀于南巢在湯則放之而不追其所往
在巢則納之而俾終夫天年初未有殺戮之事
也故終湯之世其不受命者巢伯而已武王伐
紂之後箕子則甘於即夷齊則恥於食粟商
容則竟於釋位大家弗靖奄君再叛是其劉殺
之施于當時者有不忍焉故也古以湯武並稱
要之武之慚德視湯較甚

禹貢導渭自鳥鼠同穴孔傳謂鳥鼠共為雌雄

墨談

卷十八

十一

同穴而處蔡氏謂為怪誕不取今按甘肅志涼
州之地有兀兒鼠者形狀似鼠尾若贅疣有鳥
曰本周兒者其形似雀色作灰白嘗與兀兒鼠
同穴而處所謂鳥鼠同穴者也涼州唐屬隴右
道然則孔說非誣

盜跖之言曰盜亦有道夫妄意室中之藏聖也
入先勇也出後義也分均仁也知可否智也五
者不備而能成天下之大盜者天下未之有也
富翁之言曰大凡致富之道先去五賊所謂五

賊者仁義禮智信是也蓋未有五賊不去而能成富翁者也吁五者在人富者則欲去之以致富盜者則湏籍之以成盜然則古之所謂大盜其猶賢於爲富不仁者乎

近世泥金畫漆之法本出於倭國宣德間嘗遣漆工楊某至倭國傳其法以歸楊之子填遂習之又能自出新意以五色金鈿並施不止循其舊法於是物色各稱天真爛然倭人來中國見之亦齷指稱嘆以爲雖其國創法然不能踈此妙也

墨談

卷十八

五

地之下皆水、之下乃天、之外則大氣之渾淪逼塞者包裹充滿莫有涯際又復迅行疾轉畧無少息凡其內之水與地爲繫束于勁風墨氣之中不得少下此地之所以能久浮而不墜也大要則氣舉天、包水、載地三言而已晉志論渾天以爲天外是水、以浮天而載地其見頗差先儒言日月星辰運行後水中過者當云水下其說方穩

趙簡子諭陽虎曰今而後樹人必也當擇樹桃李者夏得休息樹蒺藜者秋得其刺乃知唐世狄公薦賢有嫉之者曰天下桃李皆在公門蓋言其後之藉蔭也又賈島訕裴相詩曰不栽桃李種薔薇蓋幾其後之得刺也

王輔嗣云冬至陰之復夏至陽之復蓋復有米復之說亦有退復之義易言七曰復者來復也論語言復其位者退復也冬至陽生六陰以漸而退聽夏至陰生六陽以漸而反歸故王言陰復陽復要皆退而還復也

皇族

卷十八

十四

環谷汪氏曰周禮太司馬所言正月之吉是指夏時其言正歲則為周人建子為歲首之月其說是矣然謂周不改月則亦未足憑也蓋夏時周月在周並行時以作事故月令大司馬所用皆從夏時歲以示統故春秋所紀皆遵周月所謂周月則以十一月為一月汲書左傳可考而証也

宋元以前中國未有摺扇之製元初東南夷使

者持聚頭翁當時譏笑之我朝末樂初始有
持者然特僕隸下人用以便事人焉耳至倭國
以充貢
朝廷以徧賜羣臣內府又倣其制以供賜予於
是天下遂通用之而古團扇則惟江南之婦人
猶存其舊今持者亦鮮矣

予著墨談十八卷藏藝名久矣

邑侯双臺先生雅尚文章因執予臆閱
既徹編則以書示白是不可不傳也爰爰
弁俸付之梓且命邑民沈懷調度其事工
既訖衆謂侯此舉蓋不欲以論衡自矜之
意而懷之率義之且得書因識之末簡

嘉靖己亥春正月吉旦陳震書

兩山墨談卷之十八終

